

Date – 06/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap General (Retd) Vijay Kumar Singh chuan nimin khan Punjab National Bank dinchamphaphak 132-na puala PNB leh Indian Armed Forces tangdun buatsaih "PNB Soldierathon 2026" a tlante chu Jawaharlal Nehru Stadium, New Delhi atangin a vai liam.
2. Tun hnai khan Chin state a sipai dotu pawl hrang hrang inzawmkhawmna Chinland Council hruaitute leh ZORO leh MZP hruaitute chu Aizawl-ah an inhmuikhawm.
3. State 4 Assembly inthlan campaign in a vanglai a thleng mek.
4. Election Commission chuan Assembly inthlan turah pawisa, zu, ruihhlo leh dan phalloh thildang cheng vaibelchhe 650 hu man a ni tawh a ti.



GOVERNOR

Larsap General (Retd) Vijay Kumar Singh chuan nimin khan Punjab National Bank dinchamphaphak 132-na puala PNB leh Indian Armed Forces tangdun buatsaih "PNB Soldierathon 2026" a tlante chu Jawaharlal Nehru Stadium, New Delhi atangin a vai liam.

A tum hnihna tur PNB Soldierathon 2026 atan hian “Run For Soldiers”, tih chu thupui thlan a ni a. Operation Sindoor-a tel sipai huaisente chawimawi nan leh, 'Fit India Campaign' kaltlanga taksa hriselna ngaih pawimawh a tul zia tarlan nana huaihawt a ni a. Soldierathon hian mipui leh sipai inkarah inlaichinna tha siam a tum bawk a ni. He marathon-ah hian mi 27,000 chuang an tlan a ni.

He huna thu a sawiah Larsap General (Retd) Vijay Kumar Singh chuan Punjab National Bank leh Indian Armed Forces te'n taksa hrisel nana insawizawi pawimawh zia zirtir nana Soldierathon an buatsaih chu lawmawm a tih thu a sawi a. Fit India Campaign hmalakna hnuaiah he Soldierathon hi huaihawt a nih thu sawiin, hemi hmang hian mipuite hnenah taksa chak leh hrisel neih pawimawh zia zirtir thin a ni a, thuchah thehdarh nasat chuan khawtlangin a hlawkna a tel dawn tih a sawi bawk.

He marathon hi category pathum - 21.1 km Half Marathon, 10 km Run leh 5 km Run-ahte then a ni a, avaiin lawmman cheng nuai 19.5 hu sem chhuah a ni.



OPERATION JERICHO

Home Minister Pu K. Sapdanga'n 'Operation Jericho' hming vuaha ruihhlo do beihpui thlak mek chu chhunzawm zel a ni, a ti.

Pu K. Sapdanga'n Akashvani News a hrilh danin Operation Jericho hi March ni 31 khan tawp rih angin lang mah se ruihhlo do beihpui hi thla thlah lova thlak chhunzawm zel a nih thu a sawi a. State thenkhata inthlan a awm avangin Mizoram Police company 6 lai Assam state assembly inthlanna a duty turin tirh an nih thu a sawi a. Hetianga Police indaih lohna a nasat tak avang hian Champhai district-a Myanmar ramri hrula a ruihhlo beihpui thlak hna thawk tura Police dahte pawh hnuhdawh an ngaih thu a sawi a. He tih rual hian Champhai district bakah chhim lam, Lawngtlai leh Siaha district te, Manipur ramri dep Saitual leh Khawzawl district lamah te ruihhlo tawlhurutute'n hlet an chhuah tak avangin a theih ang anga he'ng district-a Police tam zawk ruahman tum mek a ni a ti a. A hma anga Operation Jericho hmanga ruihhlo do beihpui a siruk-la a chhunzawm leh chungchang hi sawiho chhoh mek a nih thu a sawi bawk.

April ni 1 atang khan Mizoramah ruihhlo tawlhruk leh dan kengkawhtute'n an man a pung hle a. Ni hnih/khat chung lek pawhin heroin tam tham tak man a ni. He mi chungchangah hian Home Minister chuan chhim lama Myanmar ramri hrul a awm district-te bakah Manipur ramri kal tlanga ruihhlo tawlhurutute an insawn tih thu an dawng niin a sawi a. Champhai district chauh ni lo, chhim lam leh Manipur ramri lamah te pawh ruihhlo lo lut tur veng tura thapui an thawh mek thu a sawi bawk a ni.

<><><>

MAS - LAWNGTLAI

Nikum April leh kumin March thla inkar chung khan Lawngtlai district-ah HIV hri kai leh kai lo mi 1,914 endik atangin HIV hri kai mi 57 hmuh niin endik zat atanga chhuta hri kai hmuh chhuah zat hi za zela 2.97 a ni.

Kum 2025 April leh kumin March thla a HIV inkai na te hi mipat hmeichhiat hman avanga inkai mi 34, mahni anpui kawp mi 1, hriau inhmantawm vanga kai mi 20, nu in a fa a kai mi 2 a ni a. He mi hun chung hian naupai hi mi 1,533 endik an ni a, an zinga 7 chuan HIV an kai a. Endik atanga za zela bial point 45 a ni. Hei hi tun hnai a Intensified IEC Campaign leh Mission AIDS Suraksha thlirletna huna sawi chhuah a ni a. He hunah hian Mission AIDS Suraksha (MAS) atangin report ngaihthlak a ni a. MAS hi National AIDS Control Society (NACO) in kalpui a ni a, HIV hi hlawhtling taka thunun hi a tum ber a ni. HIV vei za zela 95 talin HIV dinhmun an hriat chian bakah HIV enkawlana an la tur a ni tih a ni a. HIV veite za zela 99-te'n an enkawlana an dawn avangin viral load an paltlang tih an hre tur a ni a, Raipuar/naupai zawng zawngte tan HIV, syphilis leh Hepatitis B endiktir vek hi MAS thil tum ber a ni.

<><><>

END KHAWZAWL

Excise & Narcotics Department, Khawzawl chuan kumin chhungin ruihhlo avanga thubuai hrang hrang Case 40 an ziaklut tawh.

Excise & Narcotics Department, Khawzawl hian kuminah hian rakzu Litre 54.3 an man tawh a, hei bakah hian BEDC Litre 18.1 leh Beer Can 10 an man a, zu bilh lai Tin 120 lai an man tawh bawk a ni.

Heng Zu leh a kaihnawih an mannaah hian thubuai 40 an ziaklut tawh a, thla hlui March thla bikah khan Rakzu Litre 5.3, BEDC Litre 2 leh Zu bilh lai Tin 104 an man a, heng kaihnawihah hian thubuai 7 an ziaklut a ni.



MIZO WRITERS ASSOCIATION

Mizo Writers Association chuan nikum chhunga Mizo tawnga lehkhabu lehlin tha berah Second Chance : Israel Narvaez a thlang.

Mizo Writers Association hian kum tin Mizo tawnga lehkhabu chhuak tha ber an thlan bakah tawng danga lehkhabu chhuak Mizo tawnga lehlin tha ber an thlang thin a. Nikuma Mizo tawnga lehkhabu lehlin hrang hrang chu uluk taka an zirchian hnuah H. Ngurthansanga lehlin Second Chance: Israel Narvaez tih chu an thlang a. He lehkhabu hi Darla Milne ziah a ni.

He lehkhabu hi Mau Mau Gang hotupa Israel Narvaez chanchin a ni a, a nuna Isua a tawn theih nan hun vawi hnih a neih dan tar lan a nih bakah, Kristiante tana ngaihdamna, piantharna leh rinna thiltihtheihna sawi fiahna lehkhabu a ni.



DEBT

Tangka kum 2023-24 a Mizoramin a thawhchhuah 'Gross State Domestic Product' (GSDP) chu cheng vaibelchhe 31,917 leh nuai 72 a ni a, he tih lai hian Mizoram sorkarin hemi tangka kuma a leibat zat chu cheng vaibelchhe 12,082 leh nuai 26 a ni a. Mizoram leiba hi a thawhchhuah a tanga chhutin za zela 37 point 85 zet a ni. Tangka kum 2024-25 khan Mizoram GSDP chu cheng vaibelchhe 36,030 leh nuai 66 a tling a, mahse, sorkar leiba chu cheng vaibelchhe 14,637 leh nuai 72-ah kai chhovin sorkar leibat zat hi Mizoram sum thawhchhuah (GSDP) atanga chhuting za zela 40 point 63-ah a kai chho a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

YMA ZOBAWK GROUP

Inrinni khan YMA Zobawk Group Inkhawmpui aiawh Rorel Vawi -7-na leh Kumpuan chu Bualte Community Hall ah neih a ni.

Zobawk Group YMA President Pu C.Vanlalhmuaka chuan he hun hi kaihruiin YMA Sub-Hqrs Lunglei Secretary Pu C.Lalrindika chuan Ruihhlo Do hi kum puan ah hmalakna kal mek ani tih sawiin nasa lehzuala tan lak a ngaih avangin thar thawh leh ani a ti a, Mizoram dinhmun leh thalaite dinhmun enin thla a muang lo tih sawiin nasa taka min nghaisa mektu Ruihhlo Do turin YMA bakah mimal, chhungkua, kohhran te tanrual a pawimawh thu sawiin Ruihhlo leh a kaihnawih chu mitin hmelma ani tih a sawi.

Byte of YMA Sub-Hqrs Lunglei Secretary Pu C.Lalrindika

Pu C.Lalrindika chuan Ruihhlo Do turin mitin ralbang bik awm a rem lo tih sawiin mipui nawlpui, Kohhran leh Sawrkar in theihtawp chhuah chhungkaw tinin hmalak a ngaih thu a sawi a ni.

Tun dinhmun ah YMA Zobawk Group hnuai ah hian Branch 11 awm mek in member - 2892 an awm a, YMA member hi nikum April leh kumin April inkarah mi 16 an boral a ni.

<><><>

CHIN LEADERS

Tun hnai khan Chin state a sipai dotu pawl hrang hrang inzawmkhawmna Chinland Council hruaitute leh ZORO leh MZP hruaitute chu Aizawl-ah an inhmukhawm.

Chinland Council hruaitute leh ZORO leh MZP hruaitute inhmukhawmna-ah hian Zo hnahthlakte insuihkhawmna thu leh raltlante chungchang an sawi ni a hriat a ni a. Chinland Council Vice chairman 1, Salai Min Ngyo leh Chinland sorkar Chief Minister Salai Myo Thet te chuan, ZORO leh MZP te chu, a hrang ve ve-in an hmu a. ZORO hruaitute nen hian Mizorama raltlan awm mekte enkawl dan chungchang an sawiho bakah Zofate inpumkhatna a chak leh zual na'n leh insuihkhawm leh (Re-unification) nana hmalakna chungchangte khunkhan takin an sawiho a. ZORO hruaitute hi an President Pu R. Sangkawi-a'n a ho a ni. Chinland Council leh Chinland sorkar hruaitute hian MZP President leh an hruaitute dangte an kawm baw a. Mizorama raltlante'n chhawmdawl na bakah raltlan zinga zir laite'n University thlenga an zir theihna tur te an sawipui a ni.

He tih lai hian Mizoram University thuneitute leh Institute of Chin Affairs (ICA) tangruai chuan Mizoram University-a Kawl (Burma) tawng zirna (Diploma in Burmese Language and Communication Skills) thawh thumna chu April thla atang hian an tan leh dawn a ni.



ELECTION CAMPAIGN

Assembly inthlan campaign in a vanglai a thleng mek a. Senior BJP leader leh Prime Minister Narendra Modia chuan nimin khan West Bengal-a Cooch Behar district-ah vantlang inkhawm lian takah thu a sawi a.

(Byte of PM)

ModiState sawrkar lai Trinamool Congress chu sawiselin dan palzutna leh sawrkar inrelbawlina tha lo tak takte a sawilang a. BJP an sawrkar anih chuan hmasawanna nasa tak an thlen tur thu a tiam a ni. Hetihlai Trinamool Congress hruaitu leh State Chief Minister Mamata Banerjee chuan hmun hrang hrangah thu a sawi bawk a ni.

Assam-ah chuan Congress hruaitu leh Lok Sabha Leader of Opposition Rahul Gandhia.n Biwanath leh Golaghat ahte vantlang inkhawm a nei a. BJP na taka beiin Assembly inthlan hmasaka an intiamna tam tak an tihlawhtlinglo a ti a. Congress an sawrkar anih chuan thalaite hna a tiam a, healthcare tha, hmeichhiate dinhmun chawikan leh thingpui huana inhlawhfate nitin hlawh tihpun te a tiam a ni.

Senior BJP leader Amit Shah pawhin Keralam ah hun hmangin Kunnathunad ah bialah thu a sawi a. Keralam Assembly inthlan lo awm tur chu sarwkar thlakna mai niloin state hmabak siamna tur a ni a ti.



ECI

Election Commission chuan Assembly inthlan turah pawisa, zu, ruihhlo leh dan phalloh thildang cheng vaibelchhe 650 hu man a ni tawh a ti. EC sawidanin heng dan phalloh thilte hi voter te thlem nana hmanraw hman a ni a. State tina thil man chhinchhiah danin West Bengal ah man tam ber niin cheng vaibelchhe 319 hu man a ni a. Tamil Nadu ah cheng vaibelchhe 170, Assam ah cheng vaibelchhe 97, Kerala ah cheng vaibelchhe 58 leh Puducherry ah cheng vaibelchhe 7 te an ni.

